

左文襄公奏疏

第二函
十冊

左文襄公奏疏續編目錄

卷五十四

恭謝 天恩摺

陳湜請 賞假六箇月片

遵 旨陳明擬辦事宜摺

官軍出關分起次第行走摺

穆圖善所部暫緩出關片

請 敕部會議出關官軍應增正餉片

毅軍就食甯夏片

餉需請彙爲一案開單報銷摺

張林請卹賴長請獎片

繪具新疆圖說片

劉松山懇 恩追獎片

全福凱撤回旗片



左文襄公奏疏續編卷五十四

恭謝

天恩摺 同治十二年十一月初八日

奏爲恭謝

天恩仰祈

聖鑒事

臣於十一月初五日准兵部火票遞到同治十二年十月二十

五日內閣奉

上諭昨因肅州克復降旨將在事出力之徐占彪等分別優獎因思陝甘逆回擾亂十

有餘載勢極披猖自簡任左宗棠總督陝甘數年以來不辭艱苦次第剿除此次親臨前敵督飭將士克

復堅城關內一律肅清朕心實深嘉悅自應特沛殊恩用昭懋賞左宗棠著以陝甘總督協辦大學士該

大臣前經賞給騎都尉世職亦著改爲一等輕車都尉世職欽此跪聆之下感激涕零罔知所措伏念

荷戈萬里投筆十年受

文宗特達之知躋躋卿貳際

聖主中興之運洊擢疆圉榆隴移師繼

草玉關之檄花門獻馘幸清黑水之塵祇行

天討而申威方愧戎公之未敏乃

榮頒芝綬

寵進槐臺外僉厠內輔之班參知政事乙榜並甲科之選佐理平章

慶溢而家易勛階之散騎

賞延于世晉峻秩於輜軒聞

命自天悚懼無地荷

恩施之極渥圖報稱而彌難欽惟

皇上

單心緝學

明目求賢當

璿階之親臨慶瀛賓之大定道遵

聖軌式嚴百爾紀綱

治仰

宸謨永奠千秋磐石

臣惟有懷占鼎足吉審師中竭薄效於驚駘敢耽燕息撫遺黎於旣霽用答

鴻

施甲洗天河願種族同依

日月寅承

帝籙會人文共起風雲所有

微臣

感激榮幸下忱謹摺

左文襄公奏疏

續編卷五十四

恭謝 天恩伏乞 皇上聖鑒謹 奏

陳湜請 賞假六月片

同治十二年十一月初十日

再臣軍總理營務處布政使銜前山西按察使陳湜稟稱本司家無次丁自咸豐五年效力戎行率師轉戰江右粵西湘楚皖吳各省幾及十年致先人墳墓久未加修且葬母墳時原因山向不利權爲浮厝祇以戎馬奔馳未克請假營地安葬迨金陵克復適奉 旨補授山西按察使兼辦防務同治八年又奉

旨赴憲轅差委甘載從戎而先靈未妥每一念及五內徬徨茲幸關隴廓清及此軍務稍鬆應請給假數月俾得回籍修理先塋安葬母柩一俟事竣仍當赴營聽候驅策等情前來臣查該司從征四載勞績卓著現值關內肅清請假回籍修墓並安葬母柩自應代懇 恩施給假六箇月以慰孝思謹附片陳明

伏乞 聖鑒謹 奏

遵 旨陳明擬辦事宜摺

同治十二年十一月初十日

奏爲遵 旨陳明仰祈 聖鑒事竊臣於十一月初九日准兵部火票遞到軍機大臣字寄十月二

十九日奉 上諭前因肅州克復加恩以左宗棠協辦大學士並 賞給一等輕車都尉世職本日

復明降諭旨將穆圖善等分別加恩獎敘以示論功行賞用彰勞勩現在關內肅清隴右大兵雲集自應乘此聲威分路西征景廉駐紮古城兵力單薄亟應添派勁旅以圖進取金順所部尙有二十營若與景

廉合在一處則兵威較壯景廉本有請飭金順前赴古城之奏卽著統率各營剋日馳赴古城相機進剿以期規復烏魯木齊景廉於金順到後將各隊如何分撥前進之處卽著和衷商辦不得稍涉意見其額爾慶額馬隊卽著左宗棠飭令隨同金順西進聽候調遣哈密雖獲勝仗現在是否解圍未據文麟等續報張曜宋慶所部兵力較厚該提督等久歷戎行辦事奮勇朕所素知著卽督率所部馳往哈密駐紮會同文麟明春等相機防剿遇有軍情緩急均准會銜奏事穆圖善所部馬步各隊久駐涇州徒置無用之地卽著飭令該統領等分起前赴安敦玉一帶駐紮以爲諸軍後繼該將軍現在奏請陛見著將各隊分派起程後再行來見面授機宜以上各軍經朕酌量分派後該將軍等接奉此旨卽行奮迅前進不得託詞耽延倘有玩泄從事朕必當按律懲辦決不寬貸至各該軍馳赴關外糧餉一切及轉運事宜責任綦重必須先事預籌並督飭地方官悉心經理帶兵大員其勢難於兼顧左宗棠身任兼圻責無旁貸著卽統籌各軍所需糧餉軍火等項每月應用若干寬爲預備陸續轉輸毋令稍有缺乏如果各該軍逗遛不進則罪在主將儻因糧餉不繼致誤戎機朕惟左宗棠是問關外情形究竟若何糧運道路若何鎮迪以東俱總督統轄之地著卽詳細查明會圖呈覽河州狄道回情是否安貼該大臣督辦糧運自應駐紮肅州蘭州省城祇有藩臬駐紮是否足恃西甯安插各回衆能否不滋事端並著左宗棠豫師據實具奏左宗棠所部各隊久在邊陲其中疲乏者諒亦不少自應分別遣撤將得力之師分紮各要害以資彈壓值

此餉項支絀之時尤宜汰弱留強以節糜費欽此跪誦之下欽仰我

皇上軫念西陲洞囑邊務際此

關隴肅清爲邊塞一勞永逸之計

申命諸將剋期出關疆

臣

總司糧餉分別責任迅赴戎機在事文

武諸臣懷遵

聖訓敢不殫誠竭慮以求仰慰

宸廑竊維由肅州出嘉峪而西本漢唐師行大道

關內外風土相同非有洪濤巨浸崇山峻嶺足妨戎馬也安西玉門敦煌近雖遭白逆股匪擾掠一空然使關內之糧足供裹帶車馱駝隻足供周轉無庸仰給安西出關之兵何憚不進近時軍情無復以出關

爲苦者以此然徒言出關固尙非難至由安西抵哈密計程十一站千里而遙經由戈壁無臺站無水草

砂礫縱橫人馬每多困蹶中間僅安西城北四站馬運并尙可支帳小憩以備汲飲而亦未可久留過此

又七站始抵哈密回城地暖而腴爲纏頭回族聚居之所軍興以來音耗闊絕近被白逆股匪竄擾是否

有餘糧足供採買更無從知

臣

前在肅與諸軍集議官軍分起次第南行必先將甘涼採買糧料運存肅

州又由肅州出關運至玉門然後頭起開拔至玉門又用其私駝轉搬玉門存糧以赴安西騰出官馱官

車轉運第二起軍糧而後第三起繼進餘軍仿照辦理此抵安西州作一停頓又裹糧進哈密如此層遞

銜接人畜之力方稍舒展而士氣常新可免意外之慮矣至由哈密前進所有糧運事宜斷非

臣

力所及

自古至今從未有運涼甘肅之糧濟哈密以西軍食者語云千里饋糧士有飢色言其不宿飽也今涼甘

肅之糧運哈密計程實近三千而所歷又皆兵燹之餘砂鹵之地其勞費顧待閭閻哉諭旨飭金順額

爾慶額由哈密進古城與景廉會師金順等至安西州搬齊糧料必一面遣人赴哈密詢訪就近堪資採買者若干以定進止如就近有可設措自不須轉搬安西存糧以節勞費而張曜所部遵 旨進哈密

即可籍資其糧以進時距麥熟之期亦當不遠舊糧漸盡新穀旋升後此續進之軍方可相時而動 臣所

擬宋慶之軍及 臣部精選之軍蓄銳待發自可不誤師期 諭旨飭穆圖善率所部進駐安敦玉爲諸

軍後繼 飭 臣統需糧餉軍火等項寬爲預備陸續轉輸毋令稍有缺誤穆圖善欽奉 諭旨感激

奮興固不待言 微 臣具有天良又新蒙 特恩至優極渥苟有一籌可展竟敢稍惜心力致煩 聖

座撫衷自問何以爲安顧無如時地足以限之關內之糧搜購無餘非待明秋無從加採而前進各軍能

否就近採買騰關外存糧以供繼進之軍又難懸擬若勉挪前進各軍糧料以應穆圖善則前進各軍中

途缺食大局不堪設想若不挪前進存糧以應穆圖善續至之軍一飽無時又將何策以善其後故於接

到穆圖善咨時業將一切實在情形縷悉咨覆請其將隊伍暫駐涇州平涼一帶遵 旨陛見面陳此

時急赴安西於大局有損無益確實情由伏候 聖慈詳示機宜俾有遵循大局之幸亦 微 臣與穆圖

善之幸也至金順張曜兩軍各有專餉無待 臣籌額爾慶額所統吉林馬隊二百騎黑龍江馬隊百騎穆

圖善委解存餉三萬兩甚爲充裕其自挑涼州滿營百騎及 臣撥交桂錫楨馬隊一營一起 臣已各發滿

餉四箇月交額爾慶額並撥購到口馬二百五十四匹健駝二百隻洋馬礮軍械各件以壯其行出關各軍

所需軍火現解肅州者堪資一年之用如遇各軍餉到稍遲必應墊發者臣自當相其緩急應之惟臣軍

餉項奇絀久在

洞鑒之中如各軍視爲公中糧臺取攜自便無論點金乏術缺誤必多且將來款目

轉轆過多從何銷算此非由部臣派員專立一案隨時考核嚴切催提不可非臣力所及也

諭旨垂

詢河州秋道回情是否安帖該大臣督辦糧運自應駐紮肅州蘭州省城祇有藩臬駐紮是否足恃西甯安插各回衆能否不滋事端並著左宗棠豫師據實具奏臣維甘肅一省變亂十餘年被禍慘烈甲於天

下所以然者回變與髮逆擒逆不同而甘回與陝回起衅緣由又異當時辦法未能苦心分明遂致紛紜

日甚不可收拾也陝回之禍由於漢回構怨已久起衅之故實由漢民而匪回乘機構變並敢戕害團防

大臣據地阻兵法難曲貸迨官軍屢予痛剿兇悍首逆馬政和楊文治于彥祿等均已授首悍賊殄滅已

多所存無幾

國法已伸其餘首從各逆既俯首輸誠自可槩邀

寬典安寘甘境與漢民異處以

杜衅端通計陝回七八十萬現存者除白彥虎股內二千有奇此外安插甘境者不過六萬餘衆而已甘

回雖不如陝回之悍然人數較多自乾隆年間新教潛入內地久懷不軌詭謀祕計在入室操戈居心圖

謀不軌與

國爲仇橫互北數省無所畏忌是法所必誅時不可緩者也辦法宜嚴首惡不可稍縱倖

託

皇上福庇事機順利首逆馬化澂父子馬桂源兄弟及馬四等次第伏誅其餘各目懷異志者亦

已悉數芟夷而後安西肅州甘州涼州一帶二千餘里並無回族聚處實漢唐以來未有之奇竊計後此

疆臣能慎擇廉明守令分布各郡縣毋有擾累興教勸學潛移民俗化其愚頑則雖百世相安可也至西

甯本蒙漢回番雜處之區循化貴德巴燕戎格尤多回番而漢民頗少由西甯徑達關外有路可通不必

取道嘉峪臣飭劉錦棠於明春解凍時親歷各隘擇要修築堡寨調撥兵勇分駐絕關外相通踐徑以便

盤詰而畫郊圻就回番之情言之番愚回狡一經不法之徒造謠鼓煽易生事端蓋新定之區恩信爭治

未久也然一經持平辦理旋即帖服察看情形轄境均尙安帖不獨河狄也臣宗棠料理糧運事宜畢仍

回蘭州一爲安插肅州漢回難民一爲河湟客土難民有准於收穫後遷徙安插者應速籌辦理以期永

久一爲欠項積久遣撤無資而蒙恩飭撥部款百萬兩一時難以速到應及早預爲籌畫庶明春分

別辦理易於措手至糧運事宜繁重仍在得人而理臣不駐肅州亦可隨時料量耳臣出省時將軍營

務交河湟案內擬保陝西遇缺題奏知府並賞加鹽運使銜張宗翰及總兵范秉誠督辦城防標兵

事交中軍副將崇志料理而總司其成者藩司崇保臬司楊重雅也幸一切經理得宜民情恬謐城野市

肆晏然無驚俾臣無內顧之憂得以一意辦賊而前敵所需軍火軍裝軍餉無不應念而至不但毫無缺

誤並有臣未及催提而委解已到者臣實深資其力合無仰懇天恩加以甄錄崇保請賞加頭

品頂戴楊重雅請賞加布政使銜崇志請交軍機處記名遇有甘肅總兵缺出請旨簡放

張宗翰遇有陝甘道員缺出儘先題奏並賞加按察使銜閩浙補用總兵范秉誠以總兵記名請

旨簡放並請

賞給清字勇號以示鼓勵出自

恩施謹遵

旨據實陳明一切擬辦事宜恭摺

馳奏伏乞

皇上聖鑒訓示施行謹

奏

同治十二年十二月二十二日內閣奉

上諭左宗棠奏請將辦理營務城防各員獎勵一摺左宗棠

前次出省督兵剿賊派委布政使崇保等在省經理軍裝軍餉一切均無缺誤尙屬著有微勞自應量予獎敘布政使崇保著賞加頭品頂帶按察使楊重雅著賞加布政使銜副將崇志著交軍機處記名遇有甘肅總兵缺出請旨簡放知府張宗翰著遇有陝甘道員缺出儘先題奏并賞加按察使銜補用總兵范秉誠著以總兵記名請旨簡放并賞給博奇巴圖魯名號以示鼓勵欽此

官軍出關分起次第行走摺

同治十二年十二月初十日

奏爲敬陳官軍出關宜分起次第行走以策全功而糧運亦可接濟仰祈

聖鑒事竊肅州克復大軍

應卽乘勝出關速圖掃蕩人皆知之而能言之

微臣

始念亦謂巧遲不如拙速及體察軍情詳審局勢竊

有不敢輕議者請爲我

皇上敬陳之一在籌出關之兵宜審也通計攻肅各軍金順宋慶徐占彪及

臣節次調派馬步各起共六十餘營可謂多矣然攻堅旣久損折實多受傷成廢者亦不下數千之衆皆

所稱精銳之選也徐占彪所部蜀軍馬步十三營前後陣亡將士五百餘員名帶傷者二千四百有奇宋

慶一軍亡傷之數近千名而染病物故者亦數百計金順所部步軍卽胡世英之英禮十營本非佳選又

由甯夏拔赴涼州時逃亡不少雖幸金順隨時補輯得以成軍每戰身先作其勇氣然陣亡者數百名受傷殘廢者亦數百計此臣在肅時所深悉者肅城克復後臣與諸軍熟商非從新整理難收實效金順朱慶徐占彪均以爲然比飭隨帶之總兵戴洪勝余起立提督金慶元副將歐陽吉星等歸頭品頂戴記名提督譚上連統領併成五營益以馬隊三營駐守肅城修葺城壕俾成雄鎮飭肅州鎮總兵章洪勝接統楊世俊舊部馬步四營及親兵小隊駐嘉峪重修邊城以嚴鎖鑰並撥馬步小隊分駐關外以通玉門之氣其玉門靖邊營游擊缺委隨營總兵銜副將陳南波署理安西協副將缺委隨營提督吳次漢署理敦煌沙州營參將缺委隨營副將聶福田署理各令挑汰存營孱弱兵丁而募山內獵戶補之各足一營五百名實數照內地防勇章程以月餉責其防守本境兼護運道緝游勇臣巡視嘉峪關畢回肅卽撤徐占彪馬步七營分別回籍挑留精壯併成馬步六營於肅城外擇水草便利處紮營按日操練亦便其養傷待愈耳時因出關期近諸軍整理需時奏調張曜嵩武軍由鎮番涼州赴肅而嵩武軍到肅後軍食日增甘涼訂買運肅之糧不敷接濟各軍之用不得已商請朱慶率所部回涼州整理兼以就食朱慶又以舊部在豫者多募補易於集事而金順出關在即擬以所部現存精壯聽金順挑補額數俾期捷便臣服其力顧大局深知緩急並愜私懷旋並撥副將馮桂增馬隊一營布洛期螺絲後膛開花大礮一尊飭總兵鄧增帶領礮手隨金順出關以從其欲計此時整理就緒壁壘一新矣張曜一軍馬步十四營隊伍整肅

士飽馬騰堪稱勁旅

臣

並益以新製連架劈山礮十尊布洛期二號螺絲後膛礮一尊七響後膛礮十尊

其涼州副都統額爾慶額馬隊除自挑涼州滿營百騎外穆圖善撥交吉林二百騎黑龍江一百騎

臣慮

其軍飭總兵桂錫楨帶所部馬隊一營一起約四百騎歸其統帶計金張額三軍出關馬步共一萬數千幸皆精實可用數月而後仍可調撥勁軍陸續繼進如此士氣常新而不竭糧運常裕而不饑以之制關外客土逆回自操十全之算一在籌出關之糧運宜審也肅州安西共隸一道而產糧贏絀各屬攸殊肅州及高臺腴地也安西玉門頗多砂瘠而敦煌爲上腴軍興以來民困於逆回之擾掠復苦於軍營之捐攤久矣民人存者不過十之三四地畝荒廢居其大半官軍藉興屯之名先給領籽種牛價抵算採買糧銀搜括抑勒戶口流亡自白逆竄出關外官軍復沒固莊被陷安敦玉彫刼之狀較甚從前臣在肅見難民絡繹入關恐轉徙日多荒地無人耕墾籌銀二萬兩分給三州縣並撥寒衣萬套賑之冀留此災黎盡力屯墾庶異時餘糧出糶關外各軍可就近採買稍節勞費也然目前軍食不能取給安西則固不待言甘涼肅素稱腴地頻年戎馬被害最酷自徐占彪偏師徑搗肅州肅回縮退諸軍截定河湟甘涼道路漸次肅清農民得安耕獲倖獲中稔兩年以來尙供官軍採買然死亡既多川原耕種不過十之三四其旱地更無過問者臣由蘭到肅途間疊據土民紛紛遞呈求免採買比經再三開導除留民食及籽種外諭其悉數出糶勿任居奇幸三郡民情樸愿又知官軍誓滅此賊且能不擾遂得集有成數通計涼甘肅三

郡訂買市斗軍糧十六萬三千餘石按照額徵倉斗則三十餘萬石幾敵通省常年額賦雖優議價值每市斗一石重三百餘斤給銀四兩而民間繳納不前市價驟長每石竟至六七兩之多據甘州府縣稟報棍徒喬良廷卽喬鐸李太和造謠煽惑阻納官糧以致市肆抬價居奇貧民糶食無出軍民均困臣察訪得實立飭將喬良廷李太和杖斃並以署甘涼道蕭宗幹辦理顛預撤任查辦訪聞局員候選知縣杜輔仁甘標後營都司林長興有侵欺情事交調署甘涼道黃慶章訊實詳參自此民間交糧乃漸踴躍然以訂買糧料總數供金順張曜額爾慶額三軍食用及運糧車駄駝隻防營所需食用算至明歲六月新熟尙短糧料市斗二萬餘石現擬盡括額徵本色及各標營季糧陸續填補尙未知能否足敷且甘肅地氣高寒麥秋雖在六月而民間割麥完畢必應堆積成垛俟其稟稟秸脫始便碾打上市臣此次七月十九日由蘭州啟行八月十二日始抵肅州沿途村舍麥垛雖多而繳官上市者少明歲節候雖早計民間繳納新糧必俟八月陳糧尙應寬籌兩月庶新熟之交得資接濟此籌糧甘苦實在情形也就轉運言之自涼州至肅州共九百里又自肅州至嘉峪關至玉門縣三百六十里玉門至安西又二百里共一千四百餘里路多砂石用駝爲宜惟駝隻非農所蓄向來民間所蓄惟驛馬牛驢以供農事藉應差徭所有惟木輪大車不耐負重行遠頻年賊回擾掠牲畜極少差車無供上年成祿出關強拉差車數百輛甫至玉門車夫棄車逃回并驛馬亦拋置不顧自是更無從措手臣於夏初派弁三路出口採駝三千又偏值蒙古

駝少價昂採獲尙不及一千二百隻報到者僅祇六百餘隻臣過甘郡時道府請重價雇用民車每運糧百斤行百里許給銀四錢其應出差車許給銀二錢計四十餘日之久民車差車運糧料到局尙不滿三千石幸臣前調集各營官驛一千六百餘先後到齊起運勉資周轉而前用民價在蘭州平涼所雇商民車馱駝隻及袁保恆在河雇辦車輛亦陸續搭運軍裝軍火抵甘於是轉運稍旺肅州乃有存糧以後可不須重價雇民車然通計由涼州甘州採糧運肅由肅駝運至安西州合計民運車馱駝隻腳價官車官驛官駝員弁人夫新糧牲畜草料口袋什物局費一切攤算每糧百斤需銀十一兩七錢內外其勞如此其費如此夫豈此時財力所堪若非預籌撙節而動言用衆恐官軍之餉餽不繼精臺之儲峙早空不但後時不能保此不竭之源卽日前出關之師亦且時憂饑潰此轉運艱難之實在情形也竊維自古關塞用兵在精不在多方全盛時籌用兵卽先籌芻粟如漢趙充國古稱名將其駐軍酒泉卽今之肅州治敦煌卽今之安西州治所籌兵事重屯田而罷騎兵留步兵萬人藉省大費三奏力諍行之卒效至今言西北兵事者莫能外也乾隆間先臣兆惠苦守伊犁數月維時北路兵阻不前其深入者僅精兵數百卒能力解重圍宣威絕域約計當時北路士馬多亦不過數千然則道遠運艱不能用衆卽古今承平無事官私充足時亦無以異可知也今擬出關之金順張曜額爾慶額所部馬步已一萬數千合之員弁丁役人夫將近兩萬值哈密解嚴賊蹤向吐魯番一帶竄走師行二千里尙未知能否及賊若遽擬以大軍接

踵前進雖承平無事官私充裕時猶或難之矧當禍亂十年人物雕殘財用匱絕之日乎臣在肅時商之各軍汰疲乏冗雜弁丁以求精實遣傷殘成廢弁兵以省累察張曜一軍銳氣方新作爲頭起金順一軍次之額爾慶額又次之宋慶一軍整理需時軍裝駝隻均須增添購辦請留俟明年秋後繼發臣并擬於所部整銳足恃諸軍內再精選數千屆時慎擇統將率之同行如天之福甘涼安肅明歲豐稔西師飽騰再分起層遞而前如行衽席席邊塞肅清可操全算計期不過稍遲數月而局勢穩矣否則師行荒徼既不能因糧於敵復不能隨地徵糧士馬苦於長征求一飽而不得正恐未及遇賊軍情先搖於局勢無益而又害之且戰陣之事最忌於前突後竭行軍布陣壯士利器厚集於後則前隊得勢鋒銳有加戰勝而兵力愈增必勝之著也若全力悉注前行一洩無餘設有蹉跌無復後繼是乃危道詩言緜緜翼翼傳稱彼竭我盈蓋皆注意後路之說況出關之師所應加意者不僅哈密以西客土各回似成效不在欲速取威不僅一戰也區區之愚所爲不能自釋者以此至關外軍事除景廉每年尙間有緘牘往來餘則并未接過隻字卽鎮迪一道名雖隸陝甘總督管轄而實則由烏魯木齊都統及各大臣就近督率公事一切由其主持數十年前卽是如此臣無從過問所有哈密以西糧運事宜應由出關各軍到地自行籌畫臣固未能懸揣亦勢力所不逮非預爲諉謝也謹將籌辦出關事宜據實陳奏伏乞 聖鑒訓示施行謹

奏

穆圖善所部暫緩出關片

同治十二年十二月初十日

再臣前奉

諭旨飭於玉門安設轉運糧臺當經臣奏請

飭派戶部堂官總司其事以昭慎重旋

奉旨轉運採買非得地方大吏則呼應不靈該大臣素顧大局朕所倚畀不必再派部員以期事權歸一等因欽此仰見聖畫精詳無微不至嗣奉同治十二年十月二十九日諭旨著穆圖善飭

所部分起前赴安敦玉一帶駐紮以爲諸軍後繼該將軍現在奏請陛見著將各隊分派起程後再行來見面授機宜等因欽此查穆圖善所部吉林黑龍江馬隊新舊合計千餘騎尙多驍健所部步隊多楚蜀勇丁此外河狄之人卽甘肅所稱黑頭勇也均難得力臣自度隴以來未見獲勝一次河州敗歸未見其出隊一次穆圖善赴陝時又廣收游勇補額卽原奏所稱精壯閒勇者也此輩需染軍營惡習已深又何足恃若率以出關竊慮難與國功且恐有礙大局無論冗雜之軍虛糜至艱之餉實爲可惜也此時距明年收穫之期尙遠金張額三軍外糧無可加採駝驛無可加運固不能爲穆圖善另籌軍食卽明年收穫豐稔而所擬續進之宋慶全軍及臣部又當藉資新糧恐亦難指供穆圖善之軍區區之愚竊謂穆圖善所部步隊旣不足恃可否將宋慶整理之軍及臣部精選之軍屆時併交穆圖善總統前進仍帶所部吉林黑龍江馬隊欽遵諭旨駐安敦玉一帶以爲後繼督辦轉運事宜以昭慎重其採糧一切臣自當飭屬妥爲經理斷不令其掣肘穆圖善陛見時應否飭令將所部駐紮涇州一帶步隊槩予撤